




DŽUGAŠVILIJI

(Ili kako ljudsku glupost i bezobrazluk nikad ne treba potcijeniti..)

Ne znam jeste li primijetili da je na ovdašnjim prostorima vrlo bitno porijeklo, mislim na ono koje se tiče geografije. Naime, što ste bliže rodnom mjestu *Onoga Koji Se Pita*, to vam šanse da nešto onako zgodno privatizirate ili pojeftino kupite, drastično rastu. A i *Razvojna banka* i druge federalne sehare su vam puno bliže, njihovi haznadari mnogo benevolentniji. Ovih sam dana, naime, imala priliku vidjeti kako firma koja je zadužena preko svake mjere, sa napumpanim vrijednostima osnovnih sredstava i nekretnina i dugovima dobavljačima koji se mjere milionima, a kašnjenje plaćanja godinama, bez ikakvih problema dobija kredit *Razvojne banke*, uglavnom da vrati stare kredite i pokuša završiti bar jedan posao koji je "pojeden u klasu". Doduše, imali su jednu referencu koja je vrlo bitna, a to je da vlasnik firme ima ranč na kome se onako lijepo i diskretno može sijeliti s *Drugom Broj Dva*. A on je opet poznat po širokoj ruci nakon pola litre mehke...

Zašto je ovo isto onoliko bitno, koliko je, nažalost, uobičajeno?

Pa zato što je na sceni neokomunistički puzajući državni udar, kojim se ovo malo demokratije za koju smo se izborili želi zamijeniti totalitarnim režimom koji je doduše višekomponentan, ali ništa manje opasan. Vlast se, naime, po Maki-javeliju - koji bi, inače, na ove naše *čovječne* bio vrlo ponosan- učvršćuje dvjema bitnim stvarima: svilenim gajtanom i obećanjima/unapređenjima. Gajtan ovih dana radi li radi. Srećom, naiđe i na prepreke, kao u slučaju smjene *Neovisnog odbora za rad policije* u Tuzlanskom kantonu, ni sudije se ne daju, a ne ide im baš ni u *Bosnalijeku*, koji, kojeg li bezobrazluka, ne da svoje pare *Vladi* na upravljanje. A svi znamo kako je *Vlada* sposobna, jel'te. Date im dvije nacrtane ovce da čuvaju, a oni prokockaju najmanje tri...

A obećanja barem ne fali. *Terminali* će procvjetati sada kada se iskusni *Drug* iz Konjica počeo brinuti za njih; *Konjuh* samo što nije počeo raditi punim kapacitetom; *Krivaja* je na putu da postane gigant kakav je i bila. I to čim "pometu" novinare koji više vjeruju svojim očima nego *Drugovima*, čim pometu sudije (tužioci su svakako produžena ruka političara) koji, koje li drskosti, hoće suditi po zakonu i čim pometu i ovo malo nezavisnosti policije.

Kad to odrade, veli nam jedan dobro informiran *Drug*, tada se mogu vratiti staroj, dobroj, oprobanoj metodologiji druga *Džugašvilija*. Naime, kada su mu se drugovi svojevremeno žalili da imaju problema sa nekim čovjekom, on je vizionarski odgovorio :

"Drugovi, nema čovjeka - nema problema..."

Doduše, fali nam *Sibir* ili barem *Goli otok*. Ali nešto imam osjećaj da bi se oko takve zajedničke institucije časkom dogovorili....**B**

Aida Delić,
glavna i odgovorna urednica